

## REGIONAL NEWS

PM-KISAN

Nimina Prime Minister Pu Narendra Modi-a'n India rama kuthnathawktute tuamhlawmna ruahmanna pui ber, PM-KISAN Samman Nidhi hnuai tanpuina a semchhuahah Mizorama kuthnathawktu mi nuai 1, sing 3, sang 1 leh 238 te hnenah cheng vaibelchhe 38, nuai 6, sing 8 leh sang 6 sem chhuah tel a ni.

Sorkar thuchhuahin a sawi danin Prime Minister-in nimina Varanasi atanga Direct Benefit Transfer (DBT) kaltlanga chhuah khan ram puma kuthnathawktu mi vaibelchhe 9.70 te hnenah avaiin zheng vaibelchhe 20,500 sem chhuah a ni a. Hei hi PM-KISAN semchhuah thawh 20-na a ni . He scheme-a in ziaklut te chuan thla li danah Rs. 2000/- zelin kum khatah Rs. 6000/- an account ah DBT hmangin an dawng thin a ni. Nimina hun hman hi Mizorama ,district hrang hrangah kuthnathawktute pawhin an chhim a. State pum huapa lo chhim vena hun hi Selesih KVK hmunah hman a ni a. Forest minister Pu Lalthansanga'n a hmanpui a ni.

Kolasib District ah chuan KVK Kolasib bultumin he hun hi KVK Kolasib Training Hall ah PM KISAN hamthatna dawngtu te nen biakhmuhtheih kaltlangin mi thahnem takin an chhim a. District pisa a mi pawimawh tak takte leh VC member-te pawhin an hmanpui a ni. Lunglei District-ah chuan district agriculture officer Pu VL Hmangaihchhunga kaihhruiin Agriculture & Farmers Welfare Department-a thawktute leh kut hna thawktu mi 120 chuanguin an chhim a.

Lunglei District-ah PM-KISAN-a inziak lut ,mi 21,434 awmin, inziak lut zingah hian KYC leh Aadhaar fel lo bakah, an chin hriat tawh loh eng emaw zat an awm a. Nimina sem dawng thei tur hi mi 15,730 niin, sum hi tun tangka kum kallai meka installment vawi khatna a ni.

&lt;&gt;&lt;&gt;&lt;&gt;

NQAS

Mizorama Sawrkar damdawi-in 37-in National Quality Assurance Standards (NQAS) national certificate an nei tawh.

Health department hotute sawi danin NQAS nei tawh sorkar damdawi-in 37 bakah hian sorkar damdawi in 22-in state level certificate nei tawhin national certificate result nghak mek 6 an awm bawk. India rama Sawrkar damdawi in tha tehnaah Kolasib District Hospital a tling thar leh a. National Health Mission (NHM) Mission Director Dr. Lily Chhakchhuak hnen atanga thu dawn danin, India rama sawrkar damdawi in tha bik tehna NQAS-ah Kolasib District Hospital chu an tling thar a, tehna-ah za zelah 96 point 39 hmuin, Mizoram puma District Hospital 12 awm zingah NQAS National Certificate hmu hi 7 an awm ta a ni.

Health Minister Pi Lalrinpui chuan India rama damdawi-in tha bik thlan chhuah zingah Mizoram damdawi in an awm belh zel chu Mizoram tan mellung pawimawh tak a nih thu leh damdawi-in, district leh state-a thawktu zawng zawng te thawhrimna leh taimakna chhuanawm a tih thu sawiin, he'ng tehna te hi Sawrkar damdawi in pantu damlote chu a chhawr tangkai bertu tur an ni, ati.

&lt;&gt;&lt;&gt;&lt;&gt;

## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar puan leh a ni ang.

<><><>

## REVIVAL

Zirtawpni atanga Aizawl Salem Veng kohhranin a thlen Harhna Inkhawmpui, vawi 11-na chu zanin hian a tiak ang.

Harhna inkhawmpui thupui atan 'I Pathian tawk turin inpeih rawh' tih chu hman a ni a. Zirtawpni zanah Synod Moderator Rev. R.C. Lalnghakliana'n thuchah a sawi a. Harhna Inkhawmpuiah hian Revival Speaker - Pi Lianthangpuii, Upa C. Zanghinglova, Pu Biakhmingthanga, Pu C. Lalahawma leh Pu H. Lalhmingliana ten inkhawmpui thupui an sawi hlawm a. Zanin inkhawmah Senior Executive Secretary Rev. V.L. Luaia Hranleh-in thu a sawi ang. Inkhawm apiangin zaipawl hrang hrang an zai bakah inkhawm banah lenkhawm thin a ni.

Harhna Inkhawmpui hi tun hma chuan 'Revival Meet' ti a hman thin a ni a, Synod Revival Speaker leh Counsellor-te intuaitharna hun atan hman thin a ni a, tun dinhmunah Synod Revival hnuaiyah hian Revival Speaker 70 (Mipa 68 leh Hmeichhia 2) an awm ani.

Harhna Inkhawmpui hi Synod media pahnih - Hruaina Eng TV Channel leh Synod Information Youtube Channel-ah te LIVE-a pek chhuah thin a ni.

<><><>

## DETOUR

Vawiin chawhma dar 10:00 atangin Aizawl Bazar Bungkawn, Dawrpui bung zar, mipui leh lirthei veivak awm laia tlak mai hlauhawm nia langte chu thlak a ni dawn a. Hetiang hi a nih avangin Traffic Senior SP chuan lirthei kal dan tur a ruahman a. Bazar Bungkawn Atanga Saron Veng panna kawngpuiyah lirthei tlandan tih danglam a ngaih chang a awm dawn a. Lirthei veivak ten harsatna an tawh loh na'n a hmuna duty te thu ngaichang turin a ngenin a hriattir a ni.

<><><>

## COVID

Tun dinhmunah Mizoramah Covid-19 hri kai mi 15 enkawl lai mek an awm a, kumin chungin hri kai hmuhchhuah 28 an awm tawh.

Integrated Disease Surveillance Programme (IDSP) hotute hnen atanga thu dawn danin Ningani chawhnu leh Zirtawpni chawhma inkar chung khan Covid hri kai inringhlel mi 7 endik zingah 5-in Covid hri a kai tih hmuhchhuah a ni a. Nimin khan Covid hri kai inringhlel mi 9 sample endikte chuan hri an kai vek tih hmuhchhuah a ni bawk a. A hma lama hri kai hmuhchhuah pakhat enkawl mek tiamin mi 15 enkawl mek an ni. Hri kai hmuhchhuah hi Aizawl district ami niin Zoram Medical College & Hospital a hmuhchhuah a ni a. Hri kai tih a langchhuak lova, ngaihtuahawm a nih loh thu doctor-te'n an sawi.

<><><>